

Negara rugi

RM5 bilion setahun

Nelayan asing bolot hasil perikanan negara hampir RM5 bilion setahun

KUALA LUMPUR

Kerajaan bercadang meningkatkan aset penguatkuasaan laut negara dalam usaha mengawal pencerobohan bot nelayan asing yang menyebabkan Malaysia kehilangan hasil sehingga RM5 bilion setahun.

Menteri Pertanian dan Industri Asas Tani, Datuk Seri Salahuddin Ayub berkata, kementerian akan mengemukakan perkara itu kepada Kabinet termasuk cadangan untuk memiliki kapal induk bagi memudahkan lagi operasi penguatkuasaan di laut.

"Anggaran ketirisan atau nilai yang hilang akibat pencerobohan nelayan asing lebih kurang RM5 bilion setahun. Kita mesti tingkatkan aset dan penguatkuasaan.

"Sebelum ini pihak berkuasa telah mengambil tindakan tegas dengan melakukan Operasi Naga dan kita akan teruskan lagi dengan komitmen tiga kementerian iaitu Kementerian Pertanian dan Industri Asas Tani, Kementerian Dalam Negeri dan Kementerian Pertahanan.

"Kita mesti bertanggungjawab supaya aset dan penguatkuasaan ini ditingkatkan selain nelayan tempatan turut menjadi mata dan telinga kerajaan supaya dapat membanteras nelayan asing daripada memasuki perairan negara ini," katanya pada sesi jawab lisan persidangan Dewan Rakyat semalam.

Beliau berkata demikian bagi menjawab soalan tambahan Ahmad Amzad Mohamed (Pas-Kuala Terengganu) yang bertanya tentang jumlah kerugian negara akibat pencerobohan nelayan asing dan langkah meningkatkan keberkesanan Op Naga.

Terdahulu Ahmad Amzad turut bertanya sama ada kemunculan paus orca (paus pembunuh) di perairan Kerteh, Terengganu berhampiran dengan Pelantar Dulang Petronas baru-



Salahuddin bercakap kepada pemberita di Parlimen semalam.

baru ini mengganggu sumber perikanan negara.

Menjelaskan perkara itu Salahuddin berkata, kajian yang dilakukan oleh Institut Penyelidikan Perikanan Rantau Abang, Terengganu mendapati paus yang muncul di perairan itu pada 16 Julai lepas tidak mengancam sumber perikanan negara dan nelayan tempatan kerana migrasi populasi spesies itu tidak kerap.

"Spesies itu merupakan daripada jenis sub spesies paus pilot sirip pendek dan ia sentiasa bergerak dalam kumpulan populasi antara 10 hingga 50 ekor. Ia dipercayai menjadikan Laut China Selatan sebagai laluan migrasi ekoran musim sotong pada waktu itu," katanya.

Paus orca, katanya, disenaraikan dalam spesies mamalia akuatik terancam dan dilindungi di

Kuantiti pengisytiharan pendaratan ikan dari tahun 2014 sehingga September 2019

Tahun	/Ribuan Tan Metrik
2014	1,403.3
2015	1,103.5
2016	656.5
2017	851.2
2018	914.6
2019	588.5

(Sehingga September 2019)

(Sumber: Lembaga Kemajuan Ikan Malaysia (LKIM))

bawah penguatkuasaan Seksyen 27 Akta Perikanan Negara 1985. - Bernama

Nelayan PATI dorong angkara jenayah di laut

PELABUHAN KLANG - Agensi Penguatkuasaan Maritim (APMM) Selangor akan terus memperbanyakkan rondaan di kawasan jajaannya dalam usaha membanteras kegiatan nelayan tempatan yang menyalahgunakan lesen untuk menggaji nelayan warga asing.

Pengarah APMM Selangor, Kepten Maritim Mohammad Rosli Kassim berkata, masih banyak kehadiran bot milik nelayan tempatan kategori bot kelas B1, B dan A dikesan menggaji tekong dan awak-awak warga asing untuk menangkap ikan di perairan Selangor termasuk kategori kelas C dan ke atas.

"Kerajaan sudah memberi peluang kepada bot nelayan kelas C dan ke atas untuk menggunakan nelayan asing tetapi dengan kebenaran Ketua Pengarah Perikanan Malaysia sementara bagi bot nelayan kategori kelas B1, B dan A pula tidak dibenarkan menggunakan nelayan warga asing langsung kerana nelayan tempatan mesti mengusahakan bot itu sendiri.

"Kita akui banyak nelayan tempatan masih menggunakan kru warga asing sedangkan perkara ini sudah dibincangkan oleh persatuan nelayan sendiri yang meminta kepada pihak berwajib supaya bot nelayan kategori kelas B1, B dan A dibolehkan menggunakan khidmat pekerja asing atas alasan tiada pekerja warga tempatan mahu bekerja sebagai nelayan.

"Tetapi selagi tidak ada

hitam putih berhubung perkara itu, APMM akan terus membuat penguatkuasaan dengan lebih ketat. Jika perkara di atas bot itu dibiarkan, seolah-olah menunjukkan penguatkuasaan kita lemah.

"Lebih buruk orang tempatan itu menggunakan nelayan warga asing yang tidak memiliki dokumen pengenalan diri atau lebih tepat pendatang asing tanpa izin (PATI)," katanya.

Tambah Mohammad Rosli, pihaknya bimbang perbuatan menggaji nelayan asing PATI turut membuka kepada jenayah rentas sempadan lain terutamanya penyeludupan.

"Aktiviti ini memang APMM perlu banteras kerana dikhuatiri nelayan PATI melakukan jenayah rentas sempadan.

"Jika tidak dibendung, mereka mungkin boleh ambil peluang membawa masuk PATI lain dari laut hingga ke darat.

"Atau mereka juga mungkin digunakan sindiket untuk menyeludup dadah, rokok dan alkohol," tegasnya.

Bukan sahaja di perairan Selangor tetapi sememangnya isu bot nelayan tempatan menggunakan PATI itu antara permasalahan belum selesai secara tuntas di perairan negara.

"Mereka (pemilik bot tempatan) beri alasan terpaksa menggunakan khidmat nelayan warga asing sebab rakyat tempatan tidak berminat bekerja di laut menangkap ikan.

"Tetapi ini bukan alasannya dan APMM tidak akan berkompromi hanya kerana alasan tersebut, apatah lagi jika bot nelayan tempatan itu menggunakan PATI," katanya.



Penguatkuasa APMM Selangor menggeledah kotak simpanan ikan dalam sebuah bot ditahan.



MOHAMMAD ROSLI